

ጳውሎስ ፊልጲሲዩሳ ኣሳስ ፃፊዳ ኪታ ጋሳ ቆፋ

ጳውሎስ ፊልጲሲዩሳ ኣሳስ ፃፊዳ ኪታይ ፃፊትዳይ፡ ሮሜ ቢታን ማቄዶኒያ ኣውራጃን፡ ፊልጲሲዩሳ ቢታን ዳዒያ ዋሳ ኬላሳ። ሄ ዋሳ ኬላይ ጳውሎስ ኣወርጋ ቢታን ኮይሮ ኤሲዳ ዋሳ ኬላ። ሃ ኪታይ ፃፊትዳይ፡ ጳውሎስ ቃሾ ኬላን ዳዒያ ዋዳ ሃራ ኣማኒያ ኦሳንቸት ኢያ ኢዲዳ ዋዳይ ፊልጲሲዩሳ ዋሳ ኬላን ዳንዲዳ ዋርዶ ተሚርቲያ ጋሶን ኢያ ዋዛናይ ዳሮ ኣዛኒዳ ዋዳ። ጊዶሺን፡ ጳውሎስ ዩሱስ ኪሪሰቶሳ ሚንሉዲ ኣማኒያ ጊሾ ሃ ኪታን ቆንጨዲ ቤንቴይ፡ ኡፋይሲ፡ ኩሚላ ኣማኔቴላ። ፊልጲሲዩሳን ዳዒያ ዳሮ ኣሳይ ሮሜፔ ዲዔቲዲ ዩዳ ኣሲ። ኤንቲ ሮሜ ቢታስ ሚሹቶሶና ኡይላ ናጎሶና። ኤንታፊ ኢሶቲ ኢሶቲ ኣማኒዲ ባንታ ቢታ ኣሳን ጎዳቲዶሶና። ሄ ጎዳይ ኤንታ ቦላ ሚቶኔ ማንቆቴላ ኤሂስ (ሃ.ኦ 16:20-21)።

ጳውሎስ ሃ ኪታ ፃፊዳ ኮይሮ ጋሶይ ኢያ ማቲዋ ዋዳ ኢያ ማዳናው ፊልጲሲዩሳ ኣማኒያ ኣሳይ ኢሞታ ኢያው ዩዲዳ ጊሾ ኤንታ ጋላታናሳ። ኢያ ቦላኔ ኤንታ ቦላ ዲማ ዲማ ሚቶይ ጋኪዳባ ጊዲኮካ ኤንቲ ሚኔታና ሚላኔ ኩሚላ ኣማኔቲዲ ዳና ሚላ ሃ ዳሚዳ ኢንጂያን ኤንታ ሚንሉሴስ። ጨቆኔ ኦቶሮ ኣገዲ፡ ዩሱስ ኪሪሰቶሳ ኣሽኬቴላን ኤንቲ ኩማና ሚላ ሚንሉዲ ኤንታ ኣኬኪሴስ። ዩሱስ ኪሪሰቶሳራ ኢሲፊ ጊዶን ኤንቲ ዳሚዳ ዳያይ ያሳ ኣጶ ኬሃቴላፊ ፑልቲዳይሳኔ ኣማኖን ኤንቲ ኤኪዳይሳፊ ኣቲን ኣይሁዳታ ዋጋ ፖሎን ቤንቴዳባ ጊዶናይሳ ኤንታ ኣኬኪሴስ። ዩሱስ ኪሪሰቶሳራ ኢሲፊ ዳዒያ ኡባስ ያሳይ ኢሚያ ሳሩዋኔ ኡፋይሳ ኤንታው ፃፊስ።

ሃ ኪታይ ኤሬቴይ ኡፋይሲ፡ ኣማኔቴላ፡ ኢሲፊቴላኔ ኣማኖን ሚኒዲ ዳያ ቆንጨሲዲ ቤሴይሳና። ሄሳ ቦላ ጉጂዲ፡ ጳውሎስ ፊልጲሲዩሳ ዋሳ ኬላ ሲቂያ ጊታ ሲቁዋ ቆንጨሴስ።

ፊልጲሲዩሳ ኪታ ኣይፊ ቆፋታ

- ጌሎ ቆፋ 1:1-11
- ጳውሎስ ሃኒዲ ዳዒያ ዲሳ 1:12-26
- ኣማኖን ለሚሶ ዳያ 1:27-2:18
- ዊሞቲዮሳሲኔ ኤጳፊራዲቱስ ዳዒያ ቆፋ 2:19-30

ሞርኬታፔኔ ኢታታፔ ናጌቴሉ 3:1-4:9
ጳውሎሳኔ ፊልጲሲዩሳ ኣማኒያ ኣሳ 4:10-20
ሳሮሶኔ ኣንጅ 4:21-23

1 ኪሪሰቶስ ዩሱሳራ ኢሲፊዳ ጊሾ ያሳባ ጊዲዳ፣ ፊልጲሲዩሳ ካታማን ዴዲያ ዋሳ ኬላ ጨማታሲኔ ዳቆኔታ ኡባሰ። ዩሱሰ ኪሪሰቶሳ ኣይሌ ጊዲዳ፣ ጳውሎሳፔኔ ዪሞቲዮሳፔ ኪቴቲዳ ኪታ።

2 ኑ ኣዋ ያሳፊኔ ጎዳ ዩሱሰ ኪሪሰቶሳፔ ኣቶ ኬሃቴላይኔ ሳሮቴላይ ሂንቴው ጊደ።

ጳውሎሳ ጋላታ ዋሳ

3 ታኒ ሂንቴና ቆፒያ ዋዴ ኡባን፣ ታ ያሳ ጋላታይሰ። 4 ታኒ ሂንቴ ኡባሰ ያሳ ዋሲያ ዋዴ ኡፋይሳን ዋሳይሰ። 5 ሂንቴ ኮይሮ ጋላሳፔ ሃዲ ጋካናው፣ ዋንጌላ ማርካቴይሳን ታራ ኢሲፊ ጊዲዲ፣ ታና ማዲዳ ጊሾ ያሳ ጋላታይሰ። 6 ሂንቴ ጊደን ሎዖ ኦሶ ደሚዳ ያሳይ፣ ኪሪሰቶስ ዩሱሲ ሲሚያ ጋላሳይ ጋካናው፣ ፖላናይሳ ኤራይሰ።

7 ሂንቴ ኡባ ዋዴ ታ ዋዛናን ዴዴታ። ታኒ ኡባ ዋዴካ ሃሳዳ ቆፓናው ቤሴሰ። ሃዲ ታኒ ቃሾን ዴዳሼኔ ቃሼታናፔ ሲንሌ ዋንጌላ ናጎኒኔ ዋንጌላ ሚንላ ኤሶን ያሳይ ታው ቃዲዳ ቃዳ ሂንቴካ ታራ ሻኬቲዳታ። 8 ታኒ ሂንቴና ኡባ ኪሪሰቶስ ዩሱሳ ሲቁዋን ኣይ ማላ ላሞቲያኮ ያሳይ ታው ማርካ።

9 ሂንቴ ሲቆይ ቱማ ኤራቴላራኔ ኣኬካራ ኢሲፊ ጉጂ ጉጂ ዲጫና ማላ ያሳ ዋሳይሰ። 10 ሃሳን ሂንቴ ሎዖባ ሻኪዲ፣ ደራይሳታ፣ ኪሪሰቶሲ ሲሚያ ጋላሳን ጌሻታኔ ቦሬቶናይሳታ ጊደና። 11 ሂንቴ ዴዖይ ያሳ ቦንቹዋሲኔ ጋላታሰ ዩሱሰ ኪሪሰቶሳ ባጋራ ቤንቴያ ዪሎቴላ ኣይፊያን ኩሚዲ ኣይፋና።

ጳውሎሳ ቃሼቴላይ ዋንጌላይ ዳልጋና ማላ ማዲሰ

12 ታ ኢሻቶ፣ ታና ጋኪዳ ኡባይ ዋንጌላይ ዳልጋና ማላ ቱማ ማዲዳይሳ ሂንቴ ኤራና ማላ ኮያይሰ። 13 ታኒ ኪሪሰቶሳ ጊሾ ቃሼቲዳይሳ፣ ካዋ ኬላ ናጌይሳቲኔ ሃይሳን ዴዲያ ሃራቲ ኡባይ ኤሮሶና። 14 ታ ቃሹዋ ጋሶን ኑ ኢሻታፔ ዳሮቲ ጎዳን ኬሂ ኣማኔቲደሶና። ሃሳ ጊሾ፣ ያሳ ቃላ ያሺ ባይና ካሴይሳፊ ኣቋ ሚኒዲ ኦዳና ማላ ሚናቴሉ ዴሚደሶና።

15 ጊደሺን፣ ኢሶቲ ኢሶቲ ቃናቴኒኔ ፓላማን ኪሪሰቶሳባ ኦዶሶና፣ ሺን ሃራቲ ሱሬ ዋዛናፔ ኦዶሶና። 16 ሱሬ ዋዛናፔ ኦዶሰቲ፣ ያሳይ ታው ዋንጌላ ናጎ ኦሶ ኢሚዳይሳ ኤሪያ ጊሾ ሲቆን ኦዶሶና። 17 ሺን ታና ቃናቴይሳቲ ታ ቃሹዋ ቦላ ሃራ ማቶ ኤሃናባ ኤንታው ዳኒን ባንታና ዶሲዲ ኪሪሰቶሳባ ኦዶሶናፔ ኣቲን ቱማ ዋዛናፔ ኦዶሶና።

18 ሄሲ ኣይኮካ ማቴና። ቱማ ኦጌን ጊዲን ዋይኮ ዋርዶ ኦጌን ጊዲን ሄ ኡባን ኪሪሰቶሲ ሳባኬቴሰ። ታና ሄሲ ኡፋይሴሰ። ቃሲ ሃራባይ ታና ኡፋይሴሲያባይ። 19 ታኒ ሂንቴ ዋሳኒኔ ዬሱሰ ኪሪሰቶሳ ኣያና ማዲዋን ኣታናይሳ ኤሪያ ጊሾ ታና ኡፋይሴሰ። 20 ታ ጊታ ኣዋይኔ ኡፋይሳን ናጊያ ናጎይ ታ ዬላቶና ኣታናይሳ። ሺን ኡባ ዋዶ ኦፊይሳዳ፣ ሃዲካ ታኒ ፓፃ ዳዲን ዋይኮ ሃይቁን ያዮና ታ ኩማላ ኣሳቴላን ኪሪሰቶሲ ቦንቼታና ጋዳ ሚናቴላን ኦዶሰ። 21 ታ ዳዲኮካ ኪሪሰቶሳ ፃላላሰ ዳዳይሰ፤ ቃሲ ታ ሃይቁኮካ ታው ኣጲዳ ዋዴ። 22 ሺን ታ ፓፃ ዳዲኮ ኣይፊይ ዳዲያ ኦሶ ኦላና። ሺን ፓፃ ዳዲይሳፊኔ ሃይቆፔ ኣዉሳ ዶራኔኮ ታው ኤሬቴና። 23 ታኒ ሃ ናምባታፔ ኣዉሳ ዶራኔኮ ኡንዔታሰ። ሃ ዳዑዋፔ ሻኬታዳ ኪሪሰቶሳራ ኢሲፊ ዳናው ኣዋታይሰ፤ ኪሪሰቶሳራ ኢሲፊ ዳዲይሲ ኡባፊ ኣጲዳ ሎዎ። 24 ሺን ታኒ ሂንቴ ጊሾ ፓፃ ዳዲይሲ ሂንቴው ዳሮ ኮሺያባ።

25 ሄሳ ታኒ ጌሻዳ ኤራይሰ፤ ታኒ፣ ሂንቴ ኣማኖን ዲጫናዳኔ ኡፋይታናዳ ሂንቴራ ፓፃ ዳና። 26 ሄሳ ጊሾ፣ ታኒ ሂንቴኮ ሲማዳ ያ ዋዶ ኪሪሰቶሰ ዬሱሳራ ሂንቴ ዳዲያ ዳዑዋን ታናን ዳዲያ ጨቁቴላይ ሂንቴው ዳራና።

27 ኡባፊ ኣሊዲ፣ ሂንቴ ኪሪሰቶሳ ዋንጌላሰ ቦንቾ ኤሃያ ዳዎ ዳዲቴ። ታ ሂንቴና ቤዲን ዋይኮ ቤዶና ኢዲን ሂንቴ ኢሲ ቆፋን ሚኒዲ ኡቁዳ፣ ሃራቲ ዋንጌላን ኣማናና ማላ ኢሲ ዋዛናን ጊዲዲ ኢሲፊ ባዩቴይሳ ታ ሲዳና። 28 ሂንቴ ዋርኬታሰ ያዮፊቴ። ኤንቲ ሂንቴራ ኤቁቴያባ ጊዲኮ ሄሲ ሂንቴው ኣቶቴላሰ፣ ኤንታው ጳዮሰ ያሳፊ ጊዲዳ ማላ። 29 ኪሪሰቶሳሰ ኦሊያ ቃዳይ ሂንቴው ኢማቴዳይ፣ ሂንቴ ኢያ ኣማናና ማላ ፃላላ ጊደናሺን ሂንቴ ኢያ ጊሾ ማቶ ኤካና ማላሳ። 30 ሄሳ ጊሾ፣ ሂንቴ ታ ዋያ ካሴ ቤዲዳታ፤ ሃዲካ ታ ዋዩቴይሳ ሲዔታ። ሂንቴካ ታ ዋያ ማላ ዋዩቴታ።

2

ቱማ አሽኬቴላ

1 ኪሪሰቶስን ሂንቴ ደዒያ ደጋይ ሂንቴና ሚንጮስ፤ ቃሲ ኢያ ሲቆይካ ሂንቴና ሚንጮስ። ጌሻ ኣያናራ ሂንቴው ኢሲፊቴላ ደዒስ፤ ሂንቴ ሃራታስ ከሄታኔ ቃዴቲታ። 2 ሂዛ፣ ሂንቴ ኢሲ ቆፋን፣ ሲቆን፣ ኢሲ ዋዛናኒኔ ኣያናን ኢሲኖ ጊዲዲ ታና ፖሎ ኡፋይሲቴ። 3 ሂንቴና ዶሶን ዋይኮ ጨቁቲያ ሃዳ ኣሞን ኢሲባካ ኦላፊቴ። ሺን ሂንቴ ኢሶይ ኢሱዋፊ ገታታይስ ያጊዲ ቆፖና ሂንቴና ካዉሺቴ። 4 ሂንቴ ኢሶይ ኢሶይ፣ ሃራ ኣሲ ማዲያባ ኮዪቴ፤ ኣቴን ሂንቴና ማዲያባ ፃላላ ኮዮ፤፤።

5 ኪሪሰቶስ ዩሱሳን ደዒያ ቆፋይ ሂንቴናን ዳናው ቤሴስ።

6 ኢያው ኡባ ዋዴ ያሳ ሃኖቴላ ደዒስ።
ያኒያ ጊሾ፣ ኢያ ያሳራ ኢሲኖ ኦሊያ ሃኖታ።
ዋልቃን ኤካናው ኮዪቤና።

7 ጊደሺን፣ ኢ ባው ደዒያ ቦንቹዋ ኡባ ኣጊዲ፣
ኣይሌ ማዴታ ኤኪስ፤
ኣሴ ዳኒዲ ቆንጨሲ።

8 ኢ ባና ካዉሺስ፤
ሃይቃና ጋካናው፣
ሃሪ ኣቶሺን ማሰቃሊያ ቦላ
ሃይቃናው ከቴቲስ።

9 ሃሳ ጊሾ፣ ያሳይ ኢያ ዳር ቶቁ ቶቁ ኦሊስ፤
ቃሲ ሱንሳ ኡባፊካ ኣዲያ ቶቃ ሱንሳ ኢሚስ።

10 ሳሎኒኔ ሳዓን፣
ሳዓፔ ጋርሳን ደዒያ ኡባይ፣
ዩሱሳ ሱንሳ ቦንቹዋስ ጉልባታና።

11 ኣሳ ኡባይ ባንታ ኢንፃርሳን፣
ዩሱስ ኪሪሰቶሳ ጎዳ ያጊዲ፣
ያሳ ኣዋ ቦንቹዋስ ማርካታና።

ሃ ኣላሚያስ ፖፖ ጊዶ

12 ታ ኣሻቶ፣ ታኒ ሂንቴራ ደዒያ ዋዴ ኡባን ሂንቴ ከቴቲዳይሳዳ፣ ሃዒ ታኒ ሂንቴ ማታፔ ሃከንካ፣ ካሴይሳፊ ኣሊዲ፣ ከቴታናው ቤሴስ። ያሳስ ያሻኒኔ ኮኮርሳን ሂንቴ ኣቶቴላ ፖላናው ኦሊቴ። 13 ያሳይ፣ ሂንቴ ኢያው ኤር ጊዲ ከቴታና ማላ ኡባ ዋዴ ሂንቴ ጊዶን ኦሊስ።

14 አይ ኦሶ ኦሊሼካ ዙዙሞና ወይኮ ፓላሞና ኦሊቴ። 15 ጌላኔ ናጋራንቸ አሳ ጊደን ቦሪቶናይሳታ፣ ጌሻታኔ ፖኮይ ባይና ያሳ ናይታ ጊደቴ። ሂንቴ ኤንታ ጊደን ሳሎ ያሊንቶዳ ፖሊሼ፣ 16 ዴያ አሚያ ኪታ ኤንታው ኦዲቴ። ሄ ወዴ ታ ዳቡሪሳይኔ ታ ኦሶይ ማላ ኣቲቦና ጊሾ ኪሪሰቶሲ ያ ጋላሰ ታ ሂንቴናን ጨቁታና።

17 ሂንቴ ያሳሰ አሚያ አማኖ ኢሞታ ቦላ ታ ሱላይ ኡሻ ያርሾዳ * ጉኪኮካ ታና ኡፋይሴሰ። ሂንቴካ ታራ ኡፋይታና። 18 ሄሳዳ ሂንቴካ ኡፋይቲዲ ታናካ ኡፋይሳናው ቤሴሰ።

ዲሞቲዮሳኔ ኤጳፊራዲቲሳ

19 ታኒ ሂንቴ ዴዑዋባ ሲዓዳ ኡፋይታናው ዲሞቲዮሳ ሂንቴኮ ኤሌሳዳ ዬዳና ማላ ጎዳ ዬሱሲ ታና ማዳናይሳ አማኔታይሰ። 20 ሂንቴ ዴዑዋሰ ዋዛናፔ ቆፒያ ኢያ ማላ አሲ ሃሪ ኦኒካ ባሞ። 21 ሃራቲ ባንታና ጎዲያባ ኮዮሶናፔ ኣቲን ዬሱሰ ኪሪሰቶሲ ኮያባ ኦሎኮና። 22 ኢ ታራ ኢሲፌ ጊዲዲ ናዲ ባ አሞሰ ኦሌይሳዳ ዋንጌላ ኦሶ ኦሊዳይሳኔ አማኔቲያ አሲ ጊዴይሳ ሂንቴ ኤሬታ። 23 ሄሳ ጊሾ፣ ታባይ ሃኒያባ ቤዓዳ ኤሌሳዳ ኢያ ሂንቴኮ ዬዳና ጋዳ ቆፓይሰ። 24 ታኒ፣ ታ ሁዔን ማታ ወዴን ሂንቴኮ ባናይሳ ጎዳን አማኔታይሰ።

25 ሄሳዳካ፣ ታኒ፣ ታ ኢሻ ኤጳፊራዲቲሳ፣ ታራ ኢሲፌ ታ ባጋ ጊዲዲ ኦሊዳይሳ፣ ኦሌቲዳይሳኔ፣ ታና ማዳናው ሂንቴው ኪቲቲዳይሳ፣ ሂንቴኮ ኪታናው ቆፓሰ። 26 ኢ ሂንቴና ኡባ ቤዓናው ዳሮ ላሞቲሰ። ቃሲ ኢ ሃርጌቲዳይሳ ሂንቴ ሲዒዳ ጊሾ ባ ዋዛናን ዳሮ ኡንዔቲሰ። 27 ኢ ቱማ ሃርጌቲዲ ሃይቁ ኪቺዲ ኣቲሰ። ሺን ያሳይ ኢያው ቃጴቲሰ። ኢያ ፃላላሰ ጊደናሺን ኣዛናይ ኣዛና ቦላ ጉኩቶናዳ፣ ታወካ ቃጴቲሰ።

28 ሂዛ፣ ሂንቴ ኢያ ዛሪ ቤዒዲ ኡፋይታናዳ ታወካ ታ ዋዛና ሴላይ ኢርፃናዳ ታኒ ኢያ ኤሌሳዳ ሂንቴኮ ዬዳናው አሞታይሰ። 29 ጎዳሰ ሃጋዚያ አሳዳ ኢያ ኩሚላ ኡፋይሳን ሞኪቲ። ቃሲ ኢያ ማላ አሳ ኡባካ ቦንቺቲ። 30 ሂንቴ ታ ማታን ጊዲዲ ኦላናው ዳንዳያና ማዲያ ማዲዲ ኪሪሰቶሳ ኦሱዋ ጊሾ ባ ሼሞፑሞሰ ሚሼቶና ኢዲዲ ሃይቁ ኪቺዲ ኣቲሰ።

2:15 ዛሪ 32:5 * 2:17 ታ ሱላይ ኡሻ ያርሾዳ፡ ኢሲ ኢሲ ወዴ ያርሾ ቤሳን ያርሹቲያ ማሄ ያርሹዋ ቦላ ሃሌ ወይኮ ወይኔ ኡሻይ ጉኪሰ።

3

ቱማ ዲሎቴላ

1 ወርሴላን፣ ታ ኢሻቶ፣ ሂንቴ ጎዳባ ገዲያ ገሾ ኡፋይቲቲ። ታኒ ካሴ ፃፊዳይሳ ዛራዳ ፃፋናይሲ ታና ዋይሴና፣ ሺን ሂንቴና ባላፔ ናጋና።

2 ኢታባ ኦሊያ ካናታ፤ ቃሲ ቃፃሬታናው ኮሺሰ ገያ ኢታ አሳታፔ ናጌቲቲ። 3 ኑኒ ያሳ ጌሻ ኢያናን ጎይኒያ ገሾኔ ኑ ዴቦዋን ከሪሰቶሰ ዩሱሳን ጨቁቲያ ገሾ ቱማ ቃፃሮ ቃፃሬቲዳይሳታ። ኑኒ ካሬ አሳቴላ ቦላ ኦሴቲያባን ጨቁቶሶ።

4 ታ ካሬ አሳቴላን ጨቁታናው ኮሺኮ ታ ዳሮባን ጨቁታናው ዳንዳዳይሰ። አይ አሲካ ባ ካሬ አሳቴላን ጨቁቲያባይ ዳው ዴዔሰ ገዲ ቆፒኮ፣ ታኒ ኢያፔ ዳሮ አጳዳ ጨቁቲያባይ ዴዔሰ።

5 ታኒ ዩሌቲዳ ጎሚንታራ ቃፃሬታሰ። ታኒ ዩሌታን ኢሰራዔሌ፤ ታኒ ቢኒያሜ ዛሬ፤ ታኒ ዋላኪ ባይና አይሁዳ አሴ። አይሁዳ ሂን ናጎን ገዲኮ ታኒ ፋሪሳዌ። 6 አይሁዳ አማኑዋሰ ሚሽቴላን ገዲኮ ታኒ ዋሳ ኩላ ዩዳሳሰ። ኢሲ አሲ ሂን ናገዲ ዲሊያባ ገዲኮ፣ ታናን ቦሬይ ቤንቲቤና።

7 ሺን ካሴ ታና ማዴሰ ጋዳ ቆፒዳባ ኡባ፣ ከሪሰቶሳ ገሾ ጋዳ ማደናባ ኦላዳ ታይባሰ። 8 ሄሳ ፃላላ ገደናሽን ታኒ ታ ጎዳ ከሪሰቶሰ ዩሱሳ ኤሬይሲ ሃራባ ኡባሬ ዳሮ አጳያ ገሾ ሄ ኡባ ዋጄይ ባይናባዳ ታይባሰ። ታኒ ኢያ ገሾ ኡባባ ጳያሰ። ከሪሰቶሳ ዴማናው ኡባባ ዋራ ሆሌቲዳ ቡሬዳ ታይባይሰ። ታኒ ዩሱሳራ ኢሲኖ ገደሰ። 9 ታኒ ሂንሰ ከቲታዳ ዴሚያ ታ ሆዔ ዲሎቴላ ታው ባዎ። ከሪሰቶሳ አማኒን ቤንቲያ ዲሎቴላይ፣ ያሳ ማታፔ ያ ዲሎቴላይ ሃዒ ታው ዴዔሰ። 10 ታኒ ከሪሰቶሳኔ ኢያ ዴንዶ ዋልቃ ኤራናው ኮያይሰ። ታኒ ኢያ ማቱዋ ኢያራ ሻኬታናዉኔ ኢያ ሃይቁዋን ኢያ ዳናናው አሞታይሰ። 11 ሄሳዳካ፣ ሃይቆፔ ዴንዳዳ ሜሪናው ዴያን ዳናይሳ ኡፋይሲ ኦላይሰ።

ጋፃ ጋካናው ዋፃቲ

12 ታኒ ሃዒ ጋፃ ጋካሰ ዋይኮ ታናን ባሊ ባዋ ገኬ። ሺን ከሪሰቶሰ ዩሱሲ ታና ኦይኪዳ ገሾ ታኒ ታ ሲንላን ዴዒያ ዋይቱዋ ኦይካናው ዋፃይሲኔ ቡቴታይሰ። 13 ታ ኢሻቶ፣ ታኒ ሄሳ ዴማሰ ጋዳ ቆፒኬ፣ ሺን ታኒ ኢሲባ ኦላይሰ። ታፔ ጉዬራ ዴዔይሳ ዶጋዳ ሲንላን ዴዔይሳ ኦይካናው ዛቲራይሰ። 14 ሄሳ ገሾ፣ ታኒ ጋፃ

3:5 ሃ.ኦ 23:6፤ 26:5፤ ሮሜ 11:1 3:6 ሃ.ኦ 8:3፤ 22:4፤ 26:9-11

ጋካናው ዋፃይሰ። ያሳይ ኪሪሰቶስ ዩሱሳ ሳጋራ ሳሎ ደዑዋስ ጭገዳ ዋይቱዋ ኤካናው ዳቡራይሰ።

15 ሂዛ፣ ኩኒ ኢያናን ጋሽቲዳ ኡባይ ሄሳ ቆፓናው ቤሴሰ። ሂንቴፌ ሳጋታስ ዲማቲያ ቆፊ ዳዒኮ፣ ሄሳካ ያሳይ ሂንቴው ቆንጨሳና። 16 ጊዲኮካ፣ ኩኒ ሃኖ ጋካናው ዳዒዳ ደዑዋን፣ ኣኔ ሲንጼ ቦሰ።

17 ታ ኢሻቶ፣ ታና ዳኒቲ፤ ሄሳዳካ፣ ኩ ለሚሱዋ ካሊያ ኣሳታ ኣኩኪዲ ቤዒቲ። 18 ታኒ ሄሳ ሂንቴው ካሴ ዳሮ ቶሆ ኦዳሰ፣ ሽን ሃዒካ ዛራዳ ኣፋላን ኦዳይሰ። ኪሪሰቶሲ ማሰቃሊያ ቦላ ሃይቂዳይሳስ ባንታና ሞርኬ ኦሊዳ ዳሮ ኣሳቲ ዳዖሶና። 19 ኤንታ ወርሴላይ ጳዮ፤ ኤንታ ኡሎይ ኤንታው ያሴ። ዩላታናው ቤሲያባን ኤንቲ ጩቁቶሶና፤ ቃሲ ሃ ሳዓባ ፃላላ ቆፖሶና። 20 ኩ ቢታይ ሳሎዋና። ሳሎፔ ዩዲ ኩና ኣሻናው ዳዒያ ጎዳ ዩሱስ ኪሪሰቶሳ ናሰ። 21 ኪሪሰቶሲ ኡባባ ባ ማታፔ ጋርሳን ኦላናው ዳንዳዒያ ባ ዋልቃን ኩ ዳቡራንቾ ኣሳቲላ ላሚዲ ባ ቦንቾ ኣሳቲላ ዳኒሳና።

4

ወርሴላ ዞሬ

1 ታ ኢሻቶ፣ ታ ደሴይሳቶ፣ ታ ላሞቲይሳቶ፣ ታና ኡፋይሴይሳቶ፣ ታና ጊታዬይሳቶ ሂዛ ጎዳን ሚኒዲ ኤቂቲ።

2 ኤዋዲኔ ሲንጻካ፣ ሂንቴ ናምዒይ፣ ኢሲ ቆፋን ሚቹዳ ጎዳን ዳናዳ ታኒ ሂንቴና ዘራይሰ። 3 ታራ ኦሊያ ኣማንጼይሶ፣ ኔኒ ሃ ማጫሳታ ማዳና ሜላ ታ ኔና ዋሳይሰ። ሃ ማጫሳቲ ታራ፣ ቄሌሚንጾሳራኔ ኤንታ ሱንሳይ ያሳ ዳዖ ማፃፋን ፃፊቲዳ ሃራታራ ኢሲፌ ዋንጌላ ኡባ ቤሳ ጋላናው ዳቡሪዶሶና።

4 ጎዳራ ሂንቴ ዳዒያ ደዑዋን ኡባ ዋዴ ኡፋይቲቲ። ታኒ ሄሳ ጉጃዳካ ኦዳይሰ፤ ኡፋይቲቲ።

5 ኣሳ ኡባይ ሂንቴ ኣሽኬቲላ ኤር፤ ጎዳይ ማታን ያና። 6 ያሳ ሂንቴ ዋሲያ ዋዴ ኡባን ኢያ ጋላቲሼ፣ ሂንቴና ኮሺያባ ኡባስ ዋሲቲፔ ኣቲን ኣይቢባሰካ ሂርጎፊቲ። 7 ኣሳ ኤራቲላ ኡባፌ ኣጂያ ያሳ ሳሮቲላይ፣ ሂንቴ ዋዛናኔ ሂንቴ ቆፋ ጎዳ ዩሱስ ኪሪሰቶሳ ሳጋራ ናጋና።

8 ወርሴላን፣ ታ ኢሻቶ፣ ሂንቴ ዋዛናን ሎዖባኔ ጋላቲሲያባ ቆፒቲ። ቲማ ጊዲያባ ኡባ፣ ቦንቾባ ኡባ፣ ቆሆ ጊደናባ ኡባ፣ ጌሻባ ኡባ፣ ሲቆባ ኡባኔ ኡፋይሲያባ ኡባ ቆፒቲ። 9 ሂንቴ ታፔ

ታማሪዳባ፣ ኤኪዳባ፣ ሲዒዳባኔ ቤዒዳባ ኡባ ኦሊቱ። ሳርቴላ ኢሚያ ያሳይ ሂንቴራ ኢሲፌ ጊዳና።

ጳውሎሲ ኢሜቲዳ ኢሞታስ ጋላቲስ

10 ዳር ዋዴፍ ጉዬ፣ ሂንቴ ታባ ዛሪዲ ቆፓናው ደሚዳ ጊሾ ታኒ ጎዳን ዳር ኡፋይታይስ። ሄሳ ጉሳይ፣ ታው ቆፓናው ሂንቴው ኢንጄቶና ኢዲዳይሳፌ ኣቲን ታው ቆፋ ኣጊቤኬታ። 11 ታኒ ሄሳ ታና ማቲዳ ጊሾ ጊኬ፤ ታው ዳዒያባይ ጊዳና ጉሱ ታማራስ። 12 ታኒ ማቶቲቲዲ ዳዒያ ዲሲ ኤራይስ፤ ቃሲ ዲሬቲዲ ዳዒያ ዲሲካ ኤራይስ። ኡዒን ጊዲን ቃሲ ኣይ ዋዴካ ታኒ ካሎኔ ኮሻ፣ ፓጩኔ ፓላሃ ታማራስ። 13 ኪሪሰቶሲ ታው ኢሚያ ዋልቃን ኡባባ ኦላናው ዳንዳዒይስ።

14 ጊዲኮካ፣ ሂንቴ ታ ማቲዋ ታራ ኤኪዳይሳን ሎዖ ኦሊዴታ። 15 ፊልጲሲዩሳ ኣሳው፣ ዋንጌላ ኮይሮ ኦዳናው ታኒ ማቄደኒያፍ ኬያ ዋዴ ኢሚያባንካ ኤኪያባንካ ሂንቴ ዋሳ ኬላፌ ኣቲን ሃሪ ታና ማዲቦናይሳ ሂንቴ ኤሬታ። 16 ቴሴሎንቄን ማቶይ ጋኪዳ ዋዴካ ታና ዛሪ ዛሪዲ ማዲዴታ። 17 ታኒ፣ ሂንቴፌ ኢሞታ ኤካናው ኮያዳ ጊዳናሺን ኢሞፍ ያ ኣንጂዋ ሂንቴ ኤካና ማለሳ።

18 ታኒ፣ ሂንቴ ኢሚዳ ኡባኔ ጊዲዲ ፓላሄይሳ ኤካስ። ሂንቴ ዬዲዳ ኡባ ኤጳፊራዲቲሳፍ ኤካስ፤ ኮሺያባ ኡባይ ታው ዳዒስ። ሂንቴ ታው ዬዲዳ ኢሞይ ያሳስ ሳዋ ቶንጉ ጊያ፣ ኢ ደሲያ፣ ኢ ኡፋይቲያ ያርሾ ማላ። 19 ታ ያሳይ ባ ቦንቾ ዲሬቲላፌ፣ ኪሪሰቶስ ዬሱሳ ባጋራ ሂንቴው ኮሺያባ ኡባ ኢሚና። 20 ኑ ኣዋ ያሳስ ማሪናፍ ማሪና ጋካናው ቦንቾይ ጊዳ። ኣሚንዒ።

ወርሴላ ሳርታ

21 ኪሪሰቶስ ዬሱሳ ባጋራ ያሳባ ጊዲዳ ኡባ ሳር ጊቴ። ታራ ዳዒያ ኢሻቲ ሂንቴና ሳር ጎሶና። 22 ያሳባ ጊዲዳ ኣሳ ኡባይ፣ ኡባፌ ኣሊዲ ካወዋ ቁሳሬ ኬላን ዳዒይሳቲ ሂንቴና ሳር ጎሶና።

23 ጎዳ ዬሱስ ኪሪሰቶሳ ኣዶ ኬሃቴላይ ሂንቴራ ጊዳ።

ኦራሳ ጩቂዋ ኅፋሶ
New Testament in Gofa

copyright © 2011 Wycliffe Bible Translators, Inc.

Language: Gofa

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Gofa

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 21 Feb 2024 from source
files dated 29 Jan 2022
c35d6c73-3843-5482-b53e-7559d35deee5